

# UPRAVNI ODBOR

Uspostavljen Zakonom o sistemu indirektnog oporezivanja  
u Bosni i Hercegovini

Na osnovu člana 29. stav (2) Zakona o Upravi za indirektno oporezivanje („Službeni glasnik BiH“ broj 89/05) i člana 14 stav (3) Zakona o sistemu indirektnog oporezivanja u BiH („Službeni glasnik BiH“ broj 44/03 i 52/04), Upravni odbor, na prijedlog direktora Uprave za indirektno oporezivanje, na sjednici održanoj dana 27.10.2006. godine donosi

## PRAVILNIK o ovlaštenjima i ovlaštenim službenim licima Uprave za indirektno oporezivanje

### GLAVA I – OPĆE ODREDBE

#### Član 1. (Predmet)

Ovim Pravilnikom određuju se okviri za dodjelu ovlaštenja ovlaštenim službenim licima u pojedinim sektorima Uprave za indirektno oporezivanje (u daljnjem tekstu: „UIO“), koja pri obavljanju poslova i zadataka iz svoje nadležnosti mogu vršiti odgovarajuće radnje iz glave V Zakona o Upravi za indirektno oporezivanje.

#### Član 2. (Definicije)

U svrhu ovog pravilnika primjenjuju se sljedeće definicije:

„**Ovlaštena službena lica**„ su lica određena ovim pravilnikom koja obavljaju poslove i zadatke suzbijanja krijumčarenja, istraga, poslove carinskog nadzora i carinske kontrole, kontrole putnika i prijevoznih sredstava, revizije i kontrole naplate prihoda, te poslove prinudne naplate indirektnih poreza.

„**Lica sa naročitim ovlaštenjem**“ su lica koja su, pri obavljanju svojih poslova i zadataka, ovlaštena za poduzimanje radnji u skladu sa zakonima koji reguliraju krivične postupke u Bosni i Hercegovini.

„**Ovlaštenje u skladu sa zakonom koji regulira krivični postupak**“, podrazumijeva poduzimanje radnji na način propisan Zakonom o krivičnom postupku BiH („Službeni glasnik BiH“, broj: 3/03; 32/03; 36/03; 26/04; 63/04; 13/05, 48/05 i 75/06), odnosno, *mutatis mutandis*, zakonima koji reguliraju krivične postupke u entitetima i Distriktu Brčko.

## GLAVA II- OVLAŠTENA SLUŽBENA LICA I NJIHOVA OVLAŠTENJA

### Član 3. (Ovlaštena službena lica)

**(1)** Ovlaštena službena lica u Sektoru za provođenje i poštivanje carinskih i poreznih zakonskih propisa ( u daljnjem tekstu : „lica sa naročitim ovlaštenjima“)su:

a) U Središnjem uredu:

- pomoćnik direktora
- šef odsjeka za suzbijanje krijumčarenja,
- šef odsjeka za istrage, te lica koja rade na poslovima suzbijanja krijumčarenja i poslovima istraga,

b) U regionalnom centru:

- šef odsjeka za provođenje i poštivanje carinskih i poreznih zakonskih propisa
- šef grupe za suzbijanje krijumčarenja,
- šef grupe za istrage, te lica koja rade na poslovima suzbijanja krijumčarenja i poslovima istraga,

**(2)** Ovlaštena službena lica u Sektoru za carine:

a) U Središnjem uredu:

- šef odsjeka za kontrolu, te lica koja rade na poslovima naknadne kontrole

b) U regionalnom centru:

- šef grupe za kontrolu, te lica koja rade na poslovima naknadne kontrole,
- šef carinske ispostave, te lica koja rade na poslovima kontrole carinske dokumentacije i pregleda robe u carinskoj ispostavi,
- vođa carinskog referata,
- viši stručni saradnik-vođa smjene, te lica koja rade na poslovima prijema i kontrole carinske dokumentacije, poslovima carinskog nadzora i pregleda robe i putnika na carinskom referatu na graničnom prijelazu,

**(3)** Ovlaštena službena lica u Sektoru za poreze:

a) U Središnjem uredu:

- šef odsjeka za reviziju i kontrolu,
- šef odsjeka za kontrolu velikih poreznih obveznika,

b) U regionalnom centru:

- šef grupe za reviziju i kontrolu, te lica koja rade na poslovima revizije i kontrole,
- šef grupe za kontrolu velikih poreznih obveznika, te lica koja rade na poslovima kontrole velikih poreznih obveznika.

**(4)** Ovlašteno službeno lice u Sektoru za poslovne usluge je:

a) U Središnjem uredu:

- šef odsjeka za prinudnu naplatu

b) U regionalnom centru:

- šef grupe za prinudnu naplatu, te lica koja rade na poslovima prinudne naplate.

#### **Član 4. (Pijrenos ovlaštenja)**

(1) Izuzetno od odredbe člana 3. ovog pravilnika, direktor, odnosno lice koje on ovlasti, može, jednokratno ili na određeno vrijeme, da prenese određena ovlaštenja na određenog zaposlenog ukoliko to zahtijevaju objektivno utvrđene potrebe službe.

(2) Zaposleni iz stava (1) ovog člana, prilikom izvršavanja naloženih poslova i zadataka, ima ista prava i obaveze kao i ovlašteno službeno lice iz člana 3. ovog pravilnika.

#### **Član 5. (Ovlaštenja lica sa naročitim ovlaštenjima)**

(1) Lice sa naročitim ovlaštenjima ima pravo i obavezu da, shodno potrebama službe i konkretnog zadatka, koristi sva ovlaštenja navedena u članu 29. stav (1) Zakona o UIO, kao i ostala ovlaštenja utvrđena drugim zakonima i podzakonskim aktima.

(2) Samo su lica sa naročitim ovlaštenjima ovlaštena da koriste sljedeća ovlaštenja iz člana 29. stav (1) Zakona o UIO:

a) upotrijebiti opravdanu silu, kada je to potrebno za izvršenje njegovih službenih dužnosti;

b) nositi lako oružje.

(3) Lica sa naročitim ovlaštenjima su, naročito, ovlaštena da poduzimaju određene radnje u skladu sa Zakonom o krivičnom postupku BiH (u daljnjem tekstu: ZKP BiH), odnosno, *mutatis mutandis*, zakonima koji reguliraju krivične postupke u entitetima i Distriktu Brčko, i to:

a) pretresanje stana, prostorija i lica, u skladu sa članom od 51. do 64. ZKP BiH;

b) privremeno oduzimanje predmeta i imovine, u skladu sa članom od 65. do 74. ZKP BiH;

c) poduzimanje posebnih istražnih radnji, u skladu sa članom od 119. do 122. ZKP BiH;

d) prijavljivanje krivičnog djela, u skladu sa članom 213. ZKP BiH;

e) poduzimanje istražnih radnji, u skladu sa članom 218. ZKP BiH;

f) uzimanje izjave i prikupljanje drugih dokaza, u skladu sa članom 219. ZKP BiH;

g) zadržavanje na mjestu izvršenja krivičnog djela, u skladu sa članom 220. ZKP BiH;

h) i druge radnje, u skladu sa zakonom i uputstvima nadležnog tužioca.

#### **Član 6. (Ovlaštenja u Sektoru za carine)**

Ovlaštena službena lica iz člana 3. stav (2) ovog pravilnika primjenjuju odgovarajuća ovlaštenja na osnovu člana 29. stav (1), i druga ovlaštenja iz Zakona o Upravi za indirektno oporezivanje, Zakona o carinskoj politici u BiH, Zakona o carinskim prekršajima, ostalog prekršajnog zakonodavstva u Bosni i Hercegovini, i drugih zakona i podzakonskih akata.

#### **Član 7. (Ovlaštenja u Sektoru za poreze)**

Ovlaštena službena lica iz člana 3. stav (3) ovog pravilnika primjenjuju odgovarajuća ovlaštenja na osnovu člana 33. Zakona o Upravi za indirektno oporezivanje, i druga ovlaštenja iz Zakona o UIO, Zakona o postupku indirektnog oporezivanja, Zakona o upravnom

postupku, prekršajnog zakonodavstva u Bosni i Hercegovini, i drugih zakona i podzakonskih akata.

### **Član 8. (Ovlaštenja u Sektoru za poslovne usluge)**

Ovlaštena službena lica iz člana 3. stav (4) ovog pravilnika, primjenjuju odgovarajuća ovlaštenja iz Zakona o Upravi za indirektno oporezivanje, Zakona o postupku prinudne naplate indirektnih poreza, Zakona o postupku indirektnog oporezivanja, prekršajnog zakonodavstva u Bosni i Hercegovini, i drugih zakona i podzakonskih akata.

### **Član 9. (Identifikacija)**

(1) Ovlaštenim službenim licima iz člana 3. ovog pravilnika izdaje se službena legitimacija.

(2) Ovlaštena službena lica iz člana 3. ovog pravilnika, ukoliko poslove i zadatke obavljaju u službenoj uniformi, obavezna su, da na zahtjev stranke u postupku pokažu službenu legitimaciju. Ukoliko poslove i zadatke obavljaju u građanskom odijelu, obavezni su službenu legitimaciju pokazati prije poduzimanja bilo kakve radnje.

(3) Lica sa naročitim ovlaštenjima mogu, kod poduzimanja radnji iz člana 6. stav (3) ovog pravilnika, odgoditi identifikaciju, ukoliko bi identifikacija iz stava (2) ovog člana mogla ugroziti bezbjednost lica sa naročitim ovlaštenjem ili drugih lica, ili dovesti u pitanje postizanje zakonitog cilja koji opravdava primjenu datih ovlaštenja.

(4) Kada okolnosti iz stava (3) ovog člana prestanu, lice sa naročitim ovlaštenjem je dužno da se identifikuje na način propisan u stavu (2) ovog člana.

### **Član 10. (Primjena ovlaštenja)**

(1) Lice sa naročitim ovlaštenjima, ovlaštenja primjenjuje po nalogu neposrednog rukovodioca, po naredbi nadležnog tužioca ili suda, te izuzetno na sopstvenu inicijativu, kada to okolnosti zahtijevaju.

(2) Ostala ovlaštena službena lica ovlaštenja primjenjuju po nalogu neposrednog rukovodioca, te izuzetno na sopstvenu inicijativu, kada to okolnosti zahtijevaju.

(3) Ovlašteno službeno lice koje postupi po sopstvenoj inicijativi, dužno je da u što kraćem roku o tome obavijesti svog neposrednog rukovodioca, a lice sa naročitim ovlaštenjima, i nadležnog tužioca, ukoliko je to određeno zakonom ili podzakonskim aktom.

(4) Ovlaštena službena lica su dužna da prilikom primjene ovlaštenja koriste samo ona sredstva koja su neophodna za izvršenje postavljenog radnog zadatka-

(5) Radnje i mjere koje se poduzimaju prilikom primjene ovlaštenja moraju uvijek biti u skladu sa zakonom, i proporcionalne sa ciljem koji se njima nastoji postići, te se mora voditi računa da se njihovim poduzimanjem zadati cilj može ostvariti sa najmanje štetnih posljedica i u najkraćem mogućem vremenu.

### **GLAVA III - ZAVRŠNE ODREDBE**

#### **Član 11. (Objavljivanje)**

Ovaj pravilnik bit će objavljen u „Službenom glasniku BiH“ i u službenim glasilima entiteta i Distrikta Brčko.

#### **Član 12. (Stupanje na snagu)**

Ovaj pravilnik stupa na snagu osmog dana od dana objavljivanja u „Službenom glasniku BiH“.

**Predsjednik Upravnog odbora  
Peter Nicholl**